



Freux bei Libramont

Haut Samsdes den 20. Juni hat den Fly Fishing Club aus Lëtzebuerg éng Sortie op Freux an d' Belsch. Eis Unrees wor Haut net esou onproblematesch ausgefall, knapps op der Autobun stungen mir och schon am Stau, d' Areler Autobun wor iwwer ee puer kilometer nëmmen op der Standspur ze befueren wat natirlech mat se bruecht huet dass den Verkéierschaos net ausbliwwen ass. Esou koum et dass verschidden Memberen zwou Stonnen gebraucht hun ewou een normalerweis den Weiher zu Freux vun Lëtzebuerg aus an énger gudder Stonn ereecheen kann. Als Wiederprognose hatten se eis Moies Reen viraus gesot an géint der Mëtten sollt d' Sonn erauskommen. Esou ass et dun och komm ewell mir ënnerweë nach ee puer Schauerer hatten mée ewei mir bis zu Freux unkomm woren do huet sech dat gudd Wieder awer séier durchgesat. 14 Memberen hatten sech also Moies getraff fir zesummen mat der Méck ze fëschen an mir konnten direkt feststellen dass sech zu Freux vill geännert hat vis a vis vun eiser leschter Sortie.





Net nēnnen dass den ganzen Site am Fong gebotzt gin ass an d' Trappen aus Hasten komplett an d' Reih gesat gin sin, den Feschbesatz gēt elo och regelméisseg bedriwwen an ass och op engem Panneaux am Openthaltstraum affichéiert. Esou wor et dann och net verwonnerlech dass dës Kéier ganz vill Fesch besat woren och wann Dës awer trotzdem net esou einfach ze fänken woren. Nodeems mir eis Staangen opgeriicht haten hun mir eis op den Weë bei d' Waasser gemeet. Heibäi huet Jidereen sēng Preferenzen, esou sin déi eng direkt am Unfank vum Séi hānen bliwwen do ewou d' Waasser bis zu 8 meter déif ass, verschidden Annerer ewei den Änder, den Marc an den Patrick hun sech op den Weë bei den Anlaaf gemeet do ewou d' Waasser durchschnittlech nēnnen 1 meter déif ass an zu gudder Lescht haten mir och déi véier Booter reservéiert ewouvun och eis Fescher gebrauch gemeet hun. Et ass awer direkt opgefall dass iwwerall ganz vill Gobagen ze gesin woren an esou hun dun och déi Meeschten direkt mat der drechener Méck las geluecht. Konnten am Anlaaf esou vill Fesch gefaangen gin hun sech d' Fesch am Unfank vum Séi awer éischer selektiv gewisen an et wor ganz schwéier d' Fesch ze iwwerléschten. Et woren awer ganz schéin Fesch besat déi eis och Alles ofverlaangt hun.







Nodeems mir ee puer Stonnen gefëscht haten hun mir eis dun um halwer éng am Openthatsraum getraff ewou och den Garde vum Séi eis Rendez – vous gin hat fir ze bezuelen. Mir hun dun eis Grillade präparéiert ewoubäi mir dës Kéier awer ee bëssen Unlaafschwierigkeeten haten, d'Holzkuehlen wollten net richtég wuarm gin mee ewei mir dun awer bis richtég am gaangen woren ass et awer séier héich hir gaangen, d'Fëscher haten sech meeschtens Deel ronderem den Grill versammelt an hei wollt natirlech Een et besser wëssen ewei deen Anneren mee zum Gléck ass et ewei d'Kuehlen bis woarm woren séier gaangen an d'Fëscher haten kéng Zäit méi fir ze schnëssen ewell se Alleguer den Mond voll haten. Gedrenks wor natirlech och net ze knapp komm an esou woussten mir erëm séier dass et niewend dem Fëschen och nach anner schéin Beschäftegungen gët. Et woren awer och Fëscher dobäi déi wuel méi Gefaalen un der Halbzeit fond haten ewei um fëschen an Dës hun sech dun och gudd Zäit geloos fir an aller Rouh dat Vergaangend opzesschaffen ewou mir eis net gesin haten. Komescher Weis hun sech Mëttes d'Fëscher alleguer ee bëssen méi schwéier gedoën ewoubäi bestëmmt déi ausgiebeg Grillade net ganz onschëlleg wor.





Mée verschidden Fëscher brauchen eben och net esou laang an warden éischter deen richtegen Moment of fir dann awer esou richtég zouzeschloën. Esou hat den Jemp och wuel méi Gefaalen um Aprés – Fëschchen fond ewei um Méckenfëschchen selwer an Hien ass als leschten Mëttes unkomme fir nach éng Kéier ze fëschchen. Mée hun déi anner Fëscher Mëttes alleguer verzweifelt probéiert dach nach een Fësch ze iwwerleschten, huet den Jemp dräi mol séng Méck ausgehäit an dun hat Hien séng dräi Fësch gefaangen an konnt geméilech erëm anpacken mam Wëssen eis Anneren et awer erëm esou richtég gin ze hun, jee och domader mussen mir leider liewen mée mir hun Him dat awer vun Häerzen gegonnt (méi oder weéner) 😈! Den Pit hat Mëttes ee bëssen an der Baach gefëscht an och Hien konnt sech net beschwéieren, hat Hien dach zwee richtig déck Kripsen gefaangen. Mir hun Dës natirlech net, ewei vun esou munechen gefoudert, op den Grill gehäit mée den Pit huet se erëm schounend an d' Baach zeréck gesat. Iwwerhaapt muss een soën dass nach nie esou vill Fësch an der klénger Baach woren déi den Weiher speist, dat misst unsech jo een gudd Zeechen sin ewell dann kann d' Waasserqualitéit jo awer net esou schlecht sin.





Esou hun mir dun och erëm éng schéin Sortie erliewt mat esou muneschen Iwweraschungen ewoubäi et wirklich fir sech schwätzt dass och endlech op dësem Site ee bëssen geschafft gin ass, den Weiher vun Freux ass nämlech éng vun den

wéinegen Plazen an eiser Géigend ewou een och mam Belly – Boat fëschen kann an dodernieft ass et ëmmer interessant ee puer Alternativen ze hun ewou een ausweechen kann ewell mir schon zimlech limitéiert sën mat den Siten ewou mir iwwerhaapt nach Sortiën organiséieren kënnen. Aus bekannten Grënn faalen jo dëst Joër zwou Sortiën eweg déi ëmmer an eisem Kalener fest verankert waren esou dass mir elo een Summerlach vun bal dräi Méint hun ewou mir eis net méi gesën. Den nächste Termäin ass am September wann mir am Heischenter Gronn déi éischten Manche vun eiser Clubmeeschterschaft fëschen. Domader bleiwt mir dann ofschléissend nëmmen nach all eisen Memberen eng schéin Zäit an den Summerméint ze wënschen an ech hoffen dass mir eis dann All frësch an monter am Heischenter Gronn erëm gesën.

